

永平府志

卷五十四 雜錄二名  
二卷五十五 雜錄三  
名錄三 卷五十六  
傳四 名錄四

永平府志卷五十

列傳三

名宦二

明

徐達字天德濠人世業農達少有大志長身高顴剛毅武勇太祖之爲郭子興部帥也達時年二十二往從之一見語合洪武元年太祖卽帝位以達爲右丞相三年春帝以達爲大將軍追元嗣主先後露布聞詔振旅還京師帝迎勞於龍江乃下詔大封功臣授達開國輔運推誠宣力武臣特進光祿大夫左柱國太傅中書右丞相參軍國事改封魏國公歲祿五千石

永平府志

卷五十

名宦一

一

予世券明年率盛熙等赴北平練軍馬修城池徙山後軍民實諸衛府置二百五十四屯墾地一千三百餘頃其冬召還五年復大發兵征擴廓達戰不利死者數萬人帝以達功大弗問也明年達復帥諸將行邊破敵於答剌海還軍北平留三年而歸十四年復帥湯和等討乃兒不花已復還鎮每歲春出冬暮召還以爲常還輒上將印賜休沐宴見歡飲有布衣兄弟稱而達愈恭慎乃命有司卽舊邸前治甲第表其坊曰大功十七年太陰犯上將帝心惡之達在北平病背疽稍愈召還明年二月卒年五十四追封中山

王諡武甯

明史案舊志洪武間帝以燕民新附又地鄰邊塞於十四年命公鎮之乃依山阻海創立關城復修築牆垣阻塞隘口聯絡周密度宏遠景泰間山海士民感念功德請建專祠春秋祭膏

毛思義信陽人宏治十五年進士官永平知府正德十

三年駕幸昌平民間婦女驚避思義下令言大喪未

舉車駕必不遠出非有文書妄稱駕至擾民者治以

法鎮守中官郭原與思義有隙以聞立逮下詔獄繫

半歲謫雲南安甯知州嘉靖中累遷副都御史應天

巡撫

明史附張文明傳

王冕字服周洛陽人正德十二年進士擢兵部主事巡

視山海關嘉靖三年遼東妖賊陸雄李真等作亂突

永平府志

卷五十

名宦一

一一

入關侍吏欲扶冕趨避冕不可曰吾有親在急趨母

所執兵以衛賊至母被傷冕奮前救之被執脅以刃

大罵遂見害詔贈光祿寺少卿有司祠祀

明史

祝雄遼東人起家世廕鎮薊州善撫士治軍嚴肅寇入

塞率子弟為士卒先子少卻行法不貸世宗書其名

御屏為將三十年布袍氎笠不異卒伍既歿遺貨僅

供殮具薊人祠祝之

明史

馬芳字德馨蔚州人嘉靖三十六年遷薊鎮副總兵分

守建昌土蠻十萬騎薄界嶺口芳與總兵官歐陽安

斬首數十獲驍騎猛克兔等六人寇不知芳在芳免

胄示之驚曰馬大帥也遂卻捷聞廕世總旗未幾辛  
愛把都兒大入躡遵化玉田芳追戰金山寺有功而  
州縣殘破多總督王忬以下俱獲罪芳亦貶都督僉  
事尋移守宣府

明史

戚繼光字元敬世登州衛指揮僉事幼倜儻負奇氣家  
貧好讀書通經史大義嘉靖中嗣職用薦擢署都指  
揮僉事備倭山東改僉浙江都司充參將分部甯紹  
台三郡繼光爲將號令嚴賞罰信士無敢不用命與  
俞大猷均爲名將操行不如而果毅過之大猷老將  
務持重繼光則颯發電舉屢摧大寇名更出大猷上

永平府志

卷五十

名宦一

三

隆慶初給事中吳時來以薊門多警請召大猷繼光  
專訓邊卒部議獨用繼光乃召爲神機營副將會譚  
綸督師遼薊乃集步兵三萬徵浙兵三千請專屬繼  
光訓練帝可之二年五月命以都督同知總理薊州  
昌平保定三鎮練兵事總兵官以下悉受節制至鎮  
上疏言薊門之兵雖多亦少其原有七營軍不習戎  
事而好末技壯者役將門老弱僅充伍一也邊塞透  
迤絕鮮郵置使客終繹日事將迎參遊爲驛使營壘  
皆傳舍二也寇至則訓遣無法遠道赴期卒弊馬僵  
三也守塞之卒約束不明行伍不整四也臨陣馬軍

不用馬而反用步五也家丁盛而軍心離六也乘障卒不擇衝緩備多力分七也七害不除邊備曷修而又有不練之失六雖練無益之弊四何謂不練夫邊所藉惟兵兵所藉惟將今恩威號令不足服其心分數形名不足服其力緩急難使一也有火器不能用二也棄土著不練三也諸鎮入衛之兵嫌非統屬漫無紀律四也班軍民兵數盈四萬人各一心五也練兵之要在先練將今注意武科多方保舉似矣但此選將之事非練將之道六也何謂雖練無益今一營之卒爲礮手者常十也不知兵法五兵迭用當長以

衛短短以救長一也三軍之士各專其藝金鼓旗幟何所不蓄今皆置不用二也弓矢之力不强於寇而欲藉以制勝三也教練之法自有正門美觀則不實用實用則不美觀而今悉無其實四也臣又聞兵形象水水因地而制流兵因地而制勝薊之地有三平原廣陌內地百里以南之形也半險半易近邊之形也山谷仄隘林薄翳翳邊外之形也寇入平原利車戰在近邊利馬戰在邊外利步戰三者迭用乃可制勝今邊兵惟習馬耳未嫻山戰林戰谷戰之道也惟浙兵能之願更予臣浙東殺手礮手各三千再募西

北壯士足馬軍五枝步軍十枝專聽臣訓練軍中所  
需隨宜取給臣不勝至願又言臣官爲創設諸將視  
爲綴疣臣安從展布章下兵部言薊鎮既有總兵又  
設總理事權分諸將多觀望宜召還總兵部琥專任  
繼光乃命繼光爲總兵官鎮守薊州永平山海諸處  
而浙兵止弗調錄破吳平功進右都督寇入青山口  
拒卻之自嘉靖以來邊牆雖修墩臺未建繼光巡行  
塞上議建敵臺略言薊鎮邊垣延袤二千里一瑕則  
百堅皆瑕比來歲修歲圯徒費無益請跨牆爲臺睥  
睨四達臺高五丈虛中爲三層臺宿百人鎧仗糗糧

具備令戍卒畫地受工先建千二百座然邊卒木彊  
律以軍法將不堪請募浙人爲一軍用倡勇敢督撫  
上其議許之浙兵三千至陳郊外天大雨自朝至日  
昃植立不動邊軍大駭自是始知軍令五年秋臺功  
成精堅雄壯二千里聲勢联接詔予世廕賚銀幣繼  
光乃議立車營車一輛用四人推輓戰則結方陣而  
馬步軍處其中又制拒馬器體輕便利遏寇騎衝突  
寇至火器先發稍近則步軍持拒馬器排列而前閒  
以長鎗箠笏寇奔則騎軍逐北又置輜重營隨其後  
而以南兵爲選鋒入衛兵主策應本鎮兵專戍守節

制精明器械犀利薊門軍容遂爲諸邊冠當是時俺答已通貢宣大以西烽火寂然獨小王子後土蠻徙居插漢地控弦十餘萬常爲薊門憂而朵顏董狐狸及其兄子長昂交通土蠻時叛時服萬厯元年春二寇謀入犯馳喜峰口索賞不得則肆殺掠獵傍塞以誘官軍繼光掩擊幾獲狐狸其夏復犯桃林不得志去長昂以犯界嶺官軍斬獲多邊吏諷之降狐狸乃款關請貢廷議給以歲賞明年春長昂復窺諸口不得入則與狐狸共逼長秃令人寇繼光逐得之以歸長秃者狐狸之弟長昂叔父也於是二寇率部長親

族三百人叩關請死罪狐狸服素衣叩頭乞赦長秃繼光及總督劉應節等議遣副將史宸羅端詣喜峯口受其降皆羅拜獻還所掠邊人攢刀設誓乃釋長秃許通貢如故終繼光在鎮二寇不敢犯薊門尋以守邊勞進左都督已增建敵臺分所部十二區爲三協協置副將一人分練土馬炒蠻入犯湯克寬戰死繼光被劾不罪久之炒蠻偕妻大嬖只龍掠邊卒官軍追破之士蠻犯遼東繼光急赴偕遼東軍拒退之繼光已加太子太保錄功加少保自順義受封朝廷以八事課邊臣日積錢穀修險隘練兵馬整器械開

屯田理鹽法收塞馬散叛黨三歲則遣大臣閱視而殿最之繼光用是頻廕賚南北名將馬芳俞大猷前卒獨繼光與遼東李成梁在然薊門守甚固敵無由入盡轉而之遼故成梁擅戰功自嘉靖庚戌俺答犯京師邊防獨重薊增兵益餉騷動天下復置昌平鎮設大將與薊相脣齒猶時躡內地總督王忬楊選並坐失律誅十七年間易大將十人率以罪去繼光在鎮十六年邊備修飭薊門宴然繼之者踵其成法數十年得無事亦賴當國大臣徐階高拱張居正先後倚任之居正尤事與商摧欲爲繼光難者輒徙之去

諸督撫大臣如譚綸劉應節梁夢龍輩咸與善動無掣肘故繼光益發舒居正歿半歲給事中張鼎思言繼光不宜於北當國者遽改之廣東繼光悒悒不得志強一赴踰年卽謝病給事中張希皋等復劾之竟罷歸居三年御史傅光宅疏薦反奪俸繼光亦遂卒繼光更歷南北並著聲在南方戰功特盛北則專主守所著紀效新書練兵事實談兵者遵用焉

明史

張臣榆林衛人起行伍爲隊長躋捷精悍搏戰好陷堅從千總劉朋守黃甫川朋遇寇喪馬被圍臣單騎馳救射中其魁奪馬載朋歸由此知名旋代朋職屢戰



跨馬梁李家溝高家堡田家梁西紅山並有功遷宣  
府膳房堡守備寇嘗大入環攻堡欲生得臣臣召麾  
下酌水爲酒歡呼歌飲寇莫測所爲不敢登臣夜決  
圍出取他道以歸上官壯之擢延綏入衛遊擊將軍  
隆慶元年九月土蠻大入昌黎撫甯樂亭盧龍遊騎  
至灤河諸將莫敢戰臣獨勒兵赴之遼帥王治道曰  
敵衆我寡往必無利臣不顧率所部千人環甲直馳  
呼聲震山谷寇以數騎嘗奮前斬之追至棒槌崖斬  
首百十餘級墜崖死傷者無算事甯薊鎮諸將悉獲  
罪臣以功增秩二級無何寇潛入場子嶺參將吳昂

被戕命臣代之尋進副總兵領總督標下事改守薊  
鎮西協萬曆初錄秋防功進署都督僉事炒蠻潛入  
古北口參將苑宗儒追至十八盤山戰歿餘衆被圍  
臣急偕遊擊高廷禮等馳救寇始去坐鐫一秩五年  
春以總兵官鎮守甯夏閱邊給事中以苛禮責望劾  
罷之十一年小阿卜戶犯黑峪關守將陳文治以下  
俱逮擊詔起臣副總兵駐守馬蘭峪會朵顏長昂屢  
擾邊薊鎮總兵官楊四畏不能禦乃調四畏保定而  
徙臣代之長昂雅憚臣使其從母土阿妻東桂款關  
乞降乃撫賞如初猛可眞者俺答弟老把都棄妾也

坐與小阿卜戶犯黑峪關罷歲賞既納款復猖獗以謾詞報邊臣而令大嬖只代爲謝罪大嬖只者順義王乞慶哈棄妾也臣等測其詐令將士出塞捕二十三人繫之獄令還我被掠人猛可眞以所愛者五人在俘中許獻還所掠親叩關索故賞臣等並召大嬖只入演武場譙責甚厲兩婦叩頭請死乃貸之先後獻還八十餘人中有被拘數十年者臣以功紀錄優

敘明

董一元宣府前衛人嘉靖時歷薊鎮遊擊將軍土蠻黑石炭等以萬騎犯一片石總兵官胡鎮禦之一元功

永平府志

卷五十

名宦一

九

最超俸三級遷石門寨參將隆慶初破敵棒槌崖功復最再進二級遷副總兵駐防古北口移守宣府萬曆十一年以都督僉事爲昌平總兵官尋徙宣府十五年徙薊州久之劾罷一元歷鎮衝邊並著勞績與麻貴張臣杜松達雲爲邊將選云

明史

李成梁字汝契高祖英自朝鮮內附授世鐵嶺衛指揮僉事遂家焉成梁英毅驍健有大將才家貧不能襲職年四十猶爲諸生巡按御史器之資入京乃得襲積功爲遼東險山參將隆慶元年土蠻大入永平成梁赴援有功進副總兵仍守險山尋協守遼陽

明史

王保榆林衛人驍勇絕倫起行伍積功爲延綏參將萬  
曆十九年冬擢署都督僉事充昌平總兵官尋改山  
西薊鎮總兵官張邦奇被劾命保與易任自嘉靖庚  
戌後薊鎮重於他鎮穆宗有詔獲大小部長者破格  
酬他鎮不得比迨俺答款塞宣大山西三鎮烽烟寂  
然陝西四鎮以火落赤敗盟始復用兵然寇弱易禦  
獨泰甯插漢諸部時時犯遼東而薊門密邇王畿與  
遼帥俱慎選以保有威望用之朵顏長昂當張臣鎮  
薊時納款居五六年復連寇石門路木馬峪花場谷  
遂罷其市賞後偕銀燈寇山海關已又馳喜峯口要

賞邦奇佯許增市誘殺其通事二十五人長昂益怒  
犯大青山頃之遣其黨小郎兒等潛伏喜峯口射殺  
偵卒會保已至遂禽之長昂每資小郎兒籌策懼而  
謝罪獻還被掠人畜保乃釋還小郎兒長昂補五貢  
邊吏始補二賞互市如初御史陳遇又援穆宗詔以  
請進保署都督同知副將張守愚以下皆進秩薊三  
協南營兵戚繼光所募也調攻朝鮮撤還道石門鼓  
譟挾增月餉保誘令赴演武場擊之殺數百人以反  
聞給事中戴士衡御史汪以時言南兵未嘗反保縱  
意擊殺請遣官按問巡關御史馬文卿庇保言南兵

大逆有十尚書石星附會之遂以定變功進保秩爲

眞蔭子督撫孫鑛李頤等亦進官受賜時論尤之

明史

附董一元傳

尤繼先榆林衛人萬厯中積功爲大同副總兵尋以病歸起僉中軍府事二十一年冬爲遼東總兵官再引疾歸二十四年起鎮薊州自戚繼光鎮守十年諸部雖叛服不常然邊警頗稀寇嘗一入青山口輒敗去最後長昂導班白二部長入犯道石門闕山海關京東民盡逃入通州繼先出關寇入縱掠甯前去總督蹇達怒繼先不追擊而繼先方收詔降丁八百人欲

永平府志

卷五十

名宦一

十一

倚爲用達乃疏言番情難馭恐遺後憂請調繼先別鎮俾降丁隨往部議以延綏杜松與易任巡撫劉四科爭之達復疏言守邊在自強繼先獨言惟藉降丁去歲出關何竟不得降丁力羽書狎至邊隘虛實久爲所窺呼吸變生安所措手兵科宋一韓等力主達議且劾繼先他事繼先遂罷卒於家繼先眇一目習

兵敢戰時稱獨目將軍

明史附達雲傳

杜松字來清崑山人鎮延安衛有膽智勇健絕倫由舍人從軍累功爲憲夏守備萬厯三十三年擢署都督僉事代李如樟鎮延綏明年改鎮薊州三十六年夏

代李成梁鎮遼東

明史附  
杜桐傳

蕭如薰字季馨延安衛人萬曆中由世蔭百戶歷官甯夏總兵官二十二年徙鎮薊州久之罷歸如薰爲將持重更歷七鎮所在見稱自隆慶後款市旣成烽燧少警輦下視鎮帥爲外府山人雜流乞朝士尺牘往者無不饜所欲薊鎮戚繼光有能詩名尤好延文士傾資結納取足軍府如薰亦能詩士趨之若鶩賓座常滿妻楊氏繼妻南氏皆貴家女至脫簪珥供客猶不給軍中患苦之如薰莫能卻也一時風會所尚諸邊物力爲耗識者歎焉

明史

永平府志

卷五十

名宦一

十一

張承蔭臣子由父蔭積功至延綏副總兵勇而有謀尤精騎射數鏖戰未嘗挫衄萬曆三十七年代王威爲延綏總兵官四十年遼東總兵官麻貴罷敕承蔭馳代之虎墩兔所屬貴英哈等三十餘部悉奉約束遼西得少安承蔭旋以病去甫歲餘起守薊鎮未至復改鎮遼東四十六年四月我

大清起兵拔撫順承蔭戰死

明史附  
張臣傳

孟秋字子成荏平人舉隆慶五年進士爲昌黎知縣有善政選大理評事去之日老穉載道泣留以職方員外郎督視山海關關政久弛奸人出入自擅秋禁之

嚴中流言萬歷九年京察坐貶歸塗與妻孥共駕一  
牛車道旁觀者咸嘆息許孚遠嘗過張秋造其廬見  
茅屋數椽書史狼藉其中嘆曰孟我疆風味大江以  
南未有也我疆者秋別號也後起官刑部主事歷尚  
寶丞少卿卒秋既歿廷臣為請諡者章數十上天啓

初賜諡清憲

明史案舊志云萬歷七年任山海兵部

之辨諸生有問業者樂於啓發竟日不倦每念邊備  
日弛少罰緩盡捐以置神槍火器為戰守具或迂  
之答曰此夏官職也時江陵擅政邊帥競以賄進遼  
左尤狼藉公當官嚴檢閱因以京察被謫後起累官  
尚寶司少卿先是隆慶間為昌黎令治教兼隆事功  
懋著邑民肖像立祠祀之入名宦又案孫夏峯理學  
宗傳云嘉靖乙巳年二十一聞其邑宏山張公講王  
文成致良知而大悅於是執弟子禮庚午舉順天鄉

永平府志

卷五十

名宦一

十二

薦辛未登進士授昌黎知縣昌黎經兵燹大創民多  
逋竄秋極力安集盡除夙弊復置火器槍仗教民防  
衛未幾復業者千三百餘家嘗行部見盲廢無依者  
惻然收而養之鄰邑皆至則寓書其尹為之養有謂  
迂秋曰我非渠父母也六載為令未嘗廢講轉大理  
評事入都盡絕獻費亦峻卻人餽遺惟留情平反暇  
則集所知談學靈濟宮雖以是見嫉於人然名亦以  
是著調兵部職方主事管山海關實重地公譏察  
有法關政肅然職方郎中某銜其形已聞言於政府  
以京察當外調眾譁然不平公怡然安之遂乞致仕  
歸當昌黎入覲同眾尹見楚侗耿公獨揖先生留  
曰君何氣象之出羣乎叩其學因與定交其為詩文  
闡繹心得不事鏤雕鞏  
悅凡所著述必有發明

袁應泰字大來鳳翔人萬歷二十三年進士以按察使

治兵永平遼事方棘應泰練兵繕甲修亭障飭樓櫓

關外所需芻芟火藥之屬呼吸立應經略熊廷弼深

賴焉泰昌元年九月擢右僉都御史代周永春巡撫遼東踰月擢兵部右侍郎兼前職代廷弼爲經略而以薛國用爲巡撫應泰受事即刑白馬祀神誓以身委遼疏言臣願與遼相終始更願文武諸臣無懷二心與臣相終始有託故謝事者罪無赦熹宗優詔褒答賜尙方劍乃戮貪將何光先汰大將李光榮以下十餘人遂謀進取撫順議用兵十八萬大將十人上奏陳方略應泰厯官精敏強毅用兵非所長規畫頗疏廷弼在遼邊持法嚴部伍整肅應泰以寬矯之多所更易遼陽之破佩劍印自縊死

明史

熊廷弼字飛百江夏人萬厯二十五年舉鄉試第一明年成進士授保定推官擢御史三十六年巡按遼東天啓元年六月廷弼入朝建三方布置策廣甯用馬步列壘河上以形勢格之綴敵全力天津登萊置舟師乘虛入南衛動搖其人心敵必內顧而遼陽可復於是登萊議設巡撫如天津以陶朗先爲之而山海特設經略節制三方一事權遂進廷弼兵部尙書兼右副都御史駐山海關經略遼陽軍務廷弼因請上方劍請調兵二十餘萬以兵馬芻糗器械之屬責成戶兵工三部七月廷弼將啓行帝特賜麒麟服一彩

幣四宴之郊外文武大臣陪餞異數也又以京營選  
鋒五十護廷弼行先是袁應泰死薛國用代爲經略  
病不任事化貞乃部署諸將沿河築六營營置參將  
一人守備二人畫地分守西平鎮武柳河盤山諸要  
害各置戍設防議旣上廷弼不謂然疏言河窄難恃  
堡小難容今日但宜固守廣甯若駐兵河上兵分則  
力弱敵輕騎潛度直攻一營力必不支一營潰則諸  
營俱潰西平諸戍亦不能守河上止宜置遊繳兵更  
番出入示敵不測不宜屯聚一處爲敵所乘自河抵  
廣甯止宜多置烽堠西平諸處止宜少置戍兵爲傳

烽哨探之用而大兵悉聚廣甯相度城外形勢犄角  
立營深壘高柵以俟蓋遼陽至廣甯三百六十里非  
敵騎一日所能到有聲息我必預知斷不宜分兵防  
河先爲自弱之計也疏上優旨褒答會御史方震孺  
亦言防河六不足恃議乃寢而化貞以計不行愠甚  
盡委軍事於廷弼廷弼乃請申諭化貞不得藉口節  
制坐失事機先是四方援遼之師化貞悉改爲平遼  
遼人多不悅廷弼言遼人未叛乞改爲平東或征東  
以慰其心自是化貞與廷弼有隙而經撫不和之議  
起矣化貞爲人駸而愎素不習兵輕視大敵好謾語



文武將吏進諫悉不入與廷弼尤抵牾而廷弼亦褊淺剛愎有觸必發盛氣相加朝士多厭惡之是時廷弼主守謂遼人不可用西部不可恃永芳不可信廣甯多閒諜可虞化貞一切反之絕口不言守謂我一渡河河東人必內應且騰書中朝言仲秋之月可高枕而聽捷音識者知其僨事以疆場事重無敢言其短者二年四月廷弼化貞俱論死

明史

袁崇煥字元素東莞人萬曆四十七年進士授邵武知縣爲人慷慨負膽畧好談兵遇老校退卒輒與論塞上事曉其阨塞情形以邊才自許天啓二年正月朝

永平府志

卷五十

名宦一

十六

覲左都御史侯恂請破格用之遂擢兵部職方主事無何廣甯師潰廷議扼山海關崇煥卽單騎出閱關內外部中失袁主事訝之家人亦莫知所往已還朝具言關上形勢曰予有軍馬錢穀我一人足守此廷臣益稱其才遂起擢僉事監關外軍發帑金二十萬俾招募時關外地悉爲哈喇慎諸部所據崇煥乃駐守關內未幾諸部受款經略王在晉令崇煥移駐中前所崇煥卽夜行荆棘虎豹中以四鼓入城將士莫不壯其膽在晉深倚重之題爲甯前兵備僉事已孫承宗鎮關門倚崇煥崇煥內拊軍民外飭邊備勞績

大著崇煥嘗核虛伍立斬一校承宗怒曰監軍可專殺耶崇煥頓首謝其果於用法類此五年夏承宗與崇煥計遣將分據錦州松山杏山右屯及大小凌河繕城部居之自是甯遠且爲內地開疆復二百里十月承宗罷高第來代謂關外必不可守令盡撤錦右諸城守具移其將士於關內督屯通判金啓侗上書崇煥曰錦右大凌三城皆前鋒要地儻收兵退旣安之民庶復播遷已得之封疆再淪沒關內外堪幾次退耶崇煥亦力爭不可言兵法有進無退三城已復安可輕撤錦右動搖則甯前震驚關內亦失保障今

但擇良將守之必無他慮第意堅且欲並撤甯前二城崇煥曰我甯前道也官此當死此我必不去第無以難乃撤錦州右屯大小凌河及松山杏山塔山守具盡驅屯兵入關委棄米粟十萬餘而死亡載途哭聲震野民怨而軍益不振崇煥遂乞終制不許十二月進按察使視事如故我

大清知經略易與六年正月舉大軍西渡遼河二十三日抵甯遠崇煥聞卽偕大將桂副將左輔朱海參將大壽守備何可剛等集將士誓死守崇煥更刺血爲書激以忠義爲之下拜將士咸請效死乃盡焚城外

民居攜守具入城清野以待令同知程維模詰奸通判啟侗具守卒食辟道上行入檄前屯守將趙率教山海守將楊麒將士逃至者悉斬人心始定明日大軍進攻戴楯穴城矢石不能退崇煥令閩卒羅立發西洋巨礮傷城外軍明日再攻復被卻圍遂解而啟侗亦以然礮死初中外聞警兵部尙書王永光大集廷臣議戰守無善策經略第總兵麒並擁兵關上不救中外謂甯遠必不守及崇煥以書聞舉朝大喜立擢崇煥右僉都御命璽書獎勵桂等進秩有差高第鎮關門大反承宗政務折辱諸將諸將咸解體遇麒

若偏裨麒至見侮其卒至是坐失援第麒並褫官去以王之臣代第趙率教代麒我大清舉兵所向無不摧破諸將罔敢議戰守議戰守自崇煥始三月復設遼東巡撫以崇煥爲之崇煥旣解圍志漸驕與桂不協請移之他鎮乃召桂還崇煥以之臣奏留桂又與不協中朝慮僨事命之臣專督關內以關外屬崇煥畫關守崇煥虞廷臣忌已上言陛下以關內外分責二臣用遼人守遼土且守且戰且築且屯屯種所入可漸減海運大要堅壁清野以爲體乘閒擊瑕以爲用戰雖不足守則有餘守旣有餘

戰無不足顧勇猛圖敵敵必讐奮迅立功眾必忌任  
勞則必召怨蒙罪始可有功怨不深則勞不著罪不  
大則功不成謗書盈篋毀言曰至從古已然惟聖明  
與廷臣始終之帝優旨褒答其冬崇煥偕應坤用率  
教巡歷錦州大小凌河議大興屯田漸復第所棄舊  
土忠賢與應坤等並因是廕錦衣崇煥進所廕爲指  
揮僉事崇煥遂言遼左之壞雖人心不固亦緣失有  
形之險無以固人心兵不利野戰祇有憑堅城用大  
礮一策今山海四城旣新當更修松山諸城班軍四  
萬人缺一不可帝報從之朝議以崇煥之臣不相能  
召之臣還罷經略不設以關內外盡屬崇煥與鎮守  
中官應坤用並便宜從事五月十一日

大清兵直抵錦州四面合圍率教偕中官用嬰城守而  
遣使議和欲緩師以待救使三反不決圍益急崇煥  
以甯遠兵不可動選精騎四千令世祿大壽將繞出  
大軍後決戰外遣水師東出相牽制且請發薊鎮宣大  
兵東護關門朝廷已命山海滿桂移前屯三屯孫祖  
壽移山海宣府黑雲龍移一片石薊遼總督閻鳴泰  
移關城又發昌平天津保定兵馳赴上關檄山西河  
南山東守臣整兵聽調世祿等將行

大清已於二十八日分兵趨甯遠崇煥與中官應坤副使畢自肅督將士登陴守列營濠內用礮距擊而桂世祿大壽大戰城外士多死桂身被數矢

大軍亦旋引去時稱甯錦大捷桂率教功爲多忠賢因使其黨論崇煥不救錦州爲暮氣崇煥遂乞休未幾熹宗崩莊烈帝即位忠賢伏誅削諸冒功者廷臣爭請召崇煥其年十一月擢右都御史視兵部添注左侍郎事崇禎元年四月命以兵部尙書兼右副都御史督師薊遼兼督登萊天津軍務所司敦促上道七月崇煥入都先奏陳兵事帝召見平臺慰勞甚至咨

以方畧對曰方畧已具疏中臣受陛下特眷願假以便宜計五年全遼可復帝曰復遼朕不吝封侯賞卿努力解天下倒懸卿子孫亦受其福崇煥頓首謝帝退少憩給事中許譽卿叩以五年之畧崇煥言聖心焦勞聊以是相慰耳譽卿曰上英明安可漫對異日按期責效奈何崇煥憮然自失頃之帝出卽奏言東事本不易竣陛下旣委臣臣安敢辭難但五年內戶部轉軍餉工部給器械吏部用人兵部調兵選將須中外事事相應方克有濟帝爲飭四部臣如其言崇煥又言以臣之力制全遼有餘調眾口不足一出國

門便成萬里忌能妒功夫豈無人卽不能以權力掣臣肘亦能以意見亂臣謀帝起立傾聽諭之曰卿無疑慮朕自有主持大學士劉鴻訓等請收還之臣桂尙方劍以賜崇煥假之便宜帝悉從之賜崇煥酒饌而出崇煥以前此熊廷弼孫承宗排搆不得竟其志上言恢復之計不外臣昔年以遼人守遼土以遼土養遼人守爲正著戰爲奇著和爲旁著之說法在漸不在驟在實不在虛此臣與諸邊臣所能爲至用人之人與爲人用之人皆至尊司其鑰何以任而勿貳信而勿疑蓋馭邊臣與廷臣異軍中可驚可疑者殊

多但當論成敗之大局不必摘一言一行之微瑕事任旣重爲怨實多諸有利於封疆者皆不利於此身者也况圖敵之急敵亦從而閒之是以爲邊臣甚難陛下愛臣知臣臣何必過疑懼但中有所危不敢不告帝優詔答之賜蟒玉銀幣疏辭蟒玉不受是月川湖兵戍甯遠者以缺餉四月大譟餘十三營應之縛擊巡撫畢自肅總兵官朱梅通判張世榮推官蘇涵淳於譙樓上自肅傷重兵備副使郭廣初至躬翼自肅括撫賞及朋椿二萬金以散不厭貸商民足五萬乃解自肅疏引罪走中左所自經死崇煥以八月初

抵關聞變馳與廣密謀宥首惡張正朝張思順令捕十五人戮之市斬知謀中軍吳國琦責參將彭簪古黜都司左良玉等四人發正朝思順前鋒立功世榮涵淳以貪虐致變亦斥之獨都司程大樂一營不從變特爲獎勵一方乃靖崇煥在遼與率教大壽可剛定兵制漸及登萊天津及定東江兵制合四鎮兵十五萬三千有奇馬八萬一千有奇歲費度支四百八十餘萬減舊一百二十餘萬帝嘉獎之文龍死甫踰三月我

大清兵數十萬分道入龍井關大安口崇煥聞卽督大

永平府志

卷五十

名宦一

二十一

壽可剛等入衛以十一月十日抵薊州所歷撫甯永平遷安豐潤玉田諸城皆留兵守帝聞其至甚喜溫旨褒勉發帑金犒將士令盡統諸道援軍俄聞率教戰歿遵化三屯營皆破巡撫王元雅總兵朱國彥自盡

大清兵越薊州而西崇煥懼急引兵入護京師營廣渠門外帝立召見深加慰勞咨以戰守策賜御饌及貂裘崇煥以士馬疲敝請入休城中不許出與

大軍鏖戰互有殺傷時所入隘口乃薊遼總理劉策所轄而崇煥甫聞變卽千里赴救自謂有功無罪然都

人驟遭兵怨謗紛起謂崇煥縱敵擁兵朝士因前通和議誣其引敵脅和將爲城下之盟帝頗聞之不能無惑會

大清設閒謂崇煥密有成約令所獲宦官知之陰縱使去其人奔告於帝帝信之不疑十二月朔再召對遂縛下詔獄三年八月遂磔崇煥於市兄弟妻子流三千里籍其家崇煥無子家亦無餘貲天下冤之崇煥既縛大壽潰而去武經略滿桂以趣戰急與

大清兵戰竟死去縛崇煥時甫半月初崇煥妄殺文龍至是帝誤殺崇煥自崇煥死邊事益無人明亡徵決

永平府志

卷五十

名宦一

二十三

矣明史

孫承宗字稚繩高陽人貌奇偉鬚髯戟張與人言聲殷牆壁始爲縣學生授經邊郡往來飛狐拒馬閒直走白登又從紇干清波故道南下喜從材官老兵究問險要阨塞用是曉暢邊事萬曆三十二年登進士第二人授編修天啟二年擢禮部右侍郎未幾大清兵逼廣甯王化貞棄城走熊廷弼與俱入關帝遂拜承宗兵部尙書兼東閣大學士入直辦事越數日命以閣臣掌部務承宗上疏曰邇年兵多不練餉多不覈以將用兵而以文官招練以將臨陣而以文官



指發以武略備邊而日增置文官於幕以邊任經撫而日問戰守於朝此極弊也今天下當重將權擇一沈雄有氣略者授之節鉞得自辟置偏裨以下勿使文吏用小見沾沾陵其上邊疆小勝小敗皆不足問要使守關無闌入而徐爲恢復計因列上撫西部恤遼民簡京軍增永平大帥修薊鎮亭障開京東屯田數策帝褒納焉兵部尙書王在晉代廷弼經略遼東與總督王象乾深相倚結在晉謀用西部襲廣甯象乾甚之曰得廣甯不能守也獲罪滋大不如重關設險衛山海以衛京師在晉乃請於山海關外八里鋪

築重關用四萬人守之其僚佐袁崇煥等力爭不能得奏記於首輔葉向高向高曰是未可臆度也承宗請親往決之帝大喜加太子太保賜蟒玉銀幣抵關詰在晉曰新城成即移舊城四萬人以守乎在晉曰否當更設兵曰如此則八里內守兵八萬矣一片石西北不當設兵乎且築關在八里內新城背即舊城趾舊城之品坑地雷爲敵人設抑爲新兵設乎新城可守安用舊城如不可守則四萬新兵倒戈舊城下將開關延入乎抑閉關以委敵乎曰關外有三道關可入也曰若此則敵至而兵逃如故也安用重關曰

將建三寨於山以待潰卒曰兵未潰而築寨以待之是教之潰也且潰兵可入敵亦可尾之入今不爲恢復計畫關而守將盡撤藩籬日闕堂奧畿東其有甯宇乎在晉無以難承宗乃議守關外在晉旣去承宗自請督師詔給關防敕書以原官督山海關及薊遼天津登萊諸處軍務便宜行事不從中制而閻鳴泰爲遼東巡撫承宗乃辟職方主事鹿善繼王則古爲贊畫請帑金八十萬以行是時關上兵名七萬顧無紀律冒餉多承宗大閱汰逃將數百人遣還河南真定疲兵萬餘應詔被劾承宗請用馬世龍代之以尤

世祿王世欽爲南北帥聽世龍節制且爲世龍請尙方劍帝皆可之帝好察邊情時令東廠遣人詣關門具事狀奏報名曰較事及魏忠賢竊政遣其黨劉朝胡良輔紀用等四十五人齎內庫神礮甲仗弓矢之屬數萬至關門爲軍中用又以白金十萬蟒麒麟獅子虎豹諸幣頒賚將士而賜承宗蟒服百金慰勞之實覘軍也承宗方出關巡甯遠中路聞之立疏言中使觀兵自古有戒帝溫言報之使者至具杯茗而已鳴泰之爲巡撫也承宗薦之後知其無實軍事多不與議鳴泰快快求去承宗亦引疾言官共留承宗詆

鳴泰巡關御史潘雲翼復論劾之帝乃罷鳴泰而以張鳳翼代鳳翼怯復主守關議承宗不悅乃復出關巡視抵甯遠集將吏議所守眾多如鳳翼指獨世龍請守中後所而崇煥善繼及副將茅元儀力請守甯遠承宗然之議乃定令大壽興工崇煥滿桂守之先是虎部竊出盜掠率教捕斬四人象乾欲斬率教謝虎部承宗不可而承宗所遣王楹戍中右護其兵出採木爲西部朗疏所殺承宗怒遣世龍勦之象乾恐壞撫局令朗素縛逃人爲殺楹者以獻而增市賞千金承宗方疏爭而象乾以憂去承宗患主款者撓已

權言督師總督可勿兼設請罷已不可則弗推總督並請以遼撫移駐甯遠帝命止總督推而鳳翼謂置已死地也因大恨與其鄉人雲翼有孚等力毀世龍以撼承宗無何有孚爲薊撫岳和聲所劾益疑世龍與崇煥構陷乃共爲浮言撓出關計給事中解學龍遂極論世龍罪承宗憤抗疏陣守禦策言拒敵門庭之中與拒諸門庭外勢旣辨我促敵二百里外敵促我二百里中勢又辨蓋廣甯我遠而敵近甯遠我近而敵遠我不近逼敵敵將近而逼我今日卽不能恢遼左而甯遠覺華終不可棄請敕廷臣雜議主客之

兵可否久戍本折之餉可否久輸關外之土地人民  
可否捐棄屯築戰守可否興舉再察敵人情形果否  
坐待可以消滅臣不敢爲百年久計祇計及五年間  
究竟何如儻臣言不當立斥臣以定大計無紆迴不  
決使全軀保妻子之臣附合眾喙以殺臣一身而誤  
天下也復爲也龍辨而發有孚等交講狀承宗惡本  
兵趙彥多中制稱疾求罷舉彥自代以困之廷議不  
可而止時甯遠城工竣關外守具畢備承宗圖大舉  
奏言前哨已置連山大凌河速昇臣餉二十四萬則  
功可立奏帝命所司給之兵工二部相與謀曰餉足

渠即妄爲不如許而不與文移往復稽緩之承宗再  
疏促具以情告帝爲飭諸曹而師竟不果出當是時  
忠賢益盜柄以承宗功高欲親附之令應坤等申意  
承宗不與交一言忠賢由是大憾會忠賢逐楊漣趙  
南星高攀龍等承宗方西巡薊昌念抗疏帝未必親  
覽往在講筵每奏對輒有人乃請以賀聖壽入朝面  
奏機宜欲因是論其罪魏廣微聞之奔告忠賢承宗  
擁兵數萬將清君側兵部侍郎李祖華爲內主公立  
齏粉矣忠賢悸甚繞御牀哭帝亦爲心動令內閣擬  
旨次輔顧秉謙奮筆曰無旨離汛地非祖宗法違者

法不宥夜啟禁門召兵部尚書入令三道飛騎止之  
又矯旨諭九門守闈承宗若至齊化門反接以入承  
宗抵通州聞命而返忠賢遣人偵之一襍被置輿中  
後車鹿善繼而已意少解而其黨李蕃崔呈秀徐大  
化連疏劾之至比之王敦李懷光承宗乃杜門求罷  
五年四月給事中郭興治請令廷臣議去留論冒餉  
者復踵至遂下廷臣雜議吏部尚書崔景榮持之乃  
下詔勉留而以簡將汰兵清餉三事責承宗奏報承  
宗方遣諸將分戍錦州大小凌河松杏右屯諸要害  
拓地復二百里罷大將世欽世祿副將李秉誠孫諫

汰軍萬七千餉人省度支六十八萬而言官論世龍  
不已至九月遂有柳河之敗將士死者四百餘人語  
詳世龍傳於是臺省劾世龍并及承宗章疏數十上  
承宗求去益力十月始得請而以兵部尚書高第代  
爲經略初第力扼承宗請撤關外以守關內承宗駁  
之第深憾明年甯遠被圍乃疏言關門兵止存五萬  
言者益以爲承宗罪承宗告戶部曰第初莅關嘗給  
十一萬七千人餉今但給五萬人餉足矣第果以妄  
言引罪後忠賢遣其黨梁夢環巡關欲傳致承宗罪  
無所得而止承宗在關四年前後修復大城九堡四

十五練兵十一萬立軍營十二水營五火營二前鋒後勁營八造甲冑器械弓矢礮石渠答鹵楯之具合數百萬拓地四百里開屯五千頃歲入十五萬後敘甯遠功蔭子錦衣世千戶莊烈帝卽位在晉入爲兵部尙書恨承宗不置極論世龍及元儀熒惑樞輔壞關事又曠臺省交口詆承宗以沮其出二年十月

大清兵入大安口取遵化將薄都城廷臣爭請召承宗詔以原官兼兵部尙書守通州時烽火徧近郊承宗從二十七騎出東便門道亡其三疾馳抵通門者幾不納旣入城與保定巡撫解經侍御史方大任總兵

永平府志

卷五十

名宦一

二十九

楊國棟登陴固守而

大清兵已薄都城乃急遣遊擊尤岱以騎卒三千赴援旋遣副將劉國柱督軍二千與岱合而發密雲兵三千營東直門保定兵五千營廣甯門以其閒遣將復馬蘭三屯二城至十二月四日而有祖大壽之變大壽遼東前鋒總兵官也偕崇煥入衛見崇煥下吏懼誅遂與副將何可剛等率所部萬五千人東潰遠近大震承宗聞急遣都司賈登科齎手書慰諭大壽而令遊擊石柱國馳撫諸軍大壽見登科言麾下卒赴援連戰俱捷翼日厚賞城上人羣詈爲賊投石擊死

數人所遣邏卒指爲閒諜而殺之勞而見罪是以奔還當出擣朵顏然後束身歸命柱國追及諸軍其將士持弓刀相向皆垂涕言督歸旣戮又將以大礮擊斃我軍故至此柱國復前追大壽去已遠乃返承宗奏言大壽危疑已甚又不肯受滿桂節制因譎言激眾東奔非部下盡欲叛也當大開生路曲收眾心遼將多馬世龍舊部曲臣謹用便宜遣世龍馳諭其將士必解甲歸大壽不足慮也帝喜從之承宗密札諭大壽急上章自列且立功贖督師罪而已當爲剖白大壽諾之具列東奔之故悉如將士言帝優詔報之

命承宗移鎮關門諸將聞承宗世龍至多自拔來歸者大壽妻左氏亦以大義責其夫大壽斂兵待命當潰兵出關關被劫掠閉門罷市承宗至人心始定關城故十六里衛城止二里今敵在內關城無可守衛城連關可步履而上也乃別築牆橫互於關城穴之使礮可平出城中水不足一晝夜穿鑿百井舊汰牙門將僑寓者千人窮而思亂皆廩之於官使巡行街衢守臺護倉均有所事內閒不得發外來者輒爲邏騎所得由是關外守完乃遣世龍督步騎兵萬五千入援令遊擊祖可法等率騎兵四營西戍撫甯三年

正月大壽入關謁承宗親軍五百人甲而候於門承宗開誠與語即日列其所統步騎三萬於教場行誓師禮羣疑頓釋時我

大清已拔遵化而守之是月四日拔永平八日拔遷安遂下灤州分兵攻撫甯可法等堅守不下

大清兵遂向山海關離三十里而營副將官惟賢等力戰乃還攻撫甯及昌黎俱不下當是時京師道梗承宗大壽軍在東世龍及四方援軍在西承宗募死士沿海達京師始知關城尚無恙關西南三縣曰撫甯昌黎樂亭西北三城曰石門臺頭燕河六城東護關

門西繞永平皆近關要地承宗飭諸城嚴守而遣將戍開平復建昌聲勢始接方京師戒嚴天下勤王兵先後至者二十萬皆壁於薊門及近畿莫利先進詔旨屢督趣諸將亦時戰攻然莫能克復世龍請先復遵化承宗曰不然遵在北易取而難守不如姑留之以分其勢而先圖灤今當多爲聲勢示欲圖遵之狀以牽之諸鎮赴豐潤開平聯關兵以圖灤得灤則以開平兵守之而騎兵決戰以圖永得灤永則關永合而取遵易易矣議既定乃令東西諸營並進親詣撫甯以督之五月十日大壽及張春邛禾嘉諸軍先抵



灤城下世龍及尤世祿吳自勉楊麟王承恩繼至越  
二日克之而副將王維城亦入遷安我

大清兵守永平者盡撤而北還承宗入永平十六日諸  
將謝尙政等亦入遵化四城俱復帝爲告謝郊廟大  
行賞賚加承宗太傅賜蟒服白金世襲錦衣衛指揮  
僉事力辭太傅不受而屢疏稱疾乞休帝命閣臣議  
去留不能決特遣中書齎手詔慰問乃起視事四年  
正月出關東巡抵松山錦州還入關復西巡徧閱三  
協十二路而返條上東西邊政八事帝咸採納初右  
屯大凌河二城承宗已設兵戍守後高第來代盡撤  
之二城遂被毀至是禾嘉巡撫遼東議復取廣甯義  
州右屯三城承宗言廣甯道遠先據右屯築城大凌  
河以漸而進兵部尙書梁廷棟主之遂以七月興工  
工甫竣我

大清兵大至圍數周承宗聞馳赴錦州遣吳襄宋偉往  
救禾嘉屢易師期偉與襄又不相能遂大敗於長山  
至十月城中糧盡援絕守將祖大壽力屈出降城復  
被毀廷臣追咎築城非策也交章論禾嘉及承宗承  
宗復連疏引疾十一月得請賜銀幣乘傳歸言者追  
論其喪師辱國奪官閒住并奪甯遠世廕承宗復列

上邊計十六事而極言禾嘉軍謀牴牾之失帝報聞而已家居七年中外屢請召用不報十一年我大清兵深入內地以十一月九日攻高陽承宗率家人拒守

大兵將引去繞城納喊者三守者亦應之三曰此城笑也於法當破圍復合明日城陷被執望闕叩頭投繯而死年七十有六

明史

